

SI KRISTO MISUGOD SA IYANG YUTAN-ONG PAGPAMUHAT (Mark 1:9-13)

Dr. Wes Bredenhof

Congregation: Providence Canadian Reformed Church Hamilton, Ontario

Preached At: Langley Canadian Reformed Church Langley, B.C.

Reading: Isaiah 42:1-13

Text: Mark 1:9-13

Hinigugma nga Kongregasyon sa Ginoong Hesu-Kristo,

Ang mga mantalaan (newspaper) adunay pahina alang sa mga “Trabaho.” Kung nangita ka ug trabaho, dinhi ka pwede mangita. Kadaghanan adunay mga gikinahanglan nga mga kwalipikasyon sa mga trabaho – ang uban ngani nagkinahanglan gyud ug kahanas nga abilidad. Ang uban usab gamay lamang ang gisulat kung unsa ang gikinahanglan sa trabaho – gitawag nga paglarawan sa trabaho (job-description).

Sa Balaang Kasulatan, makita usab nato ang daghan nga paglarawan sa mga trabaho. Makita na sa Biblia kung unsay mga gikinahanglan aron ang usa mahimong hari, huwes, propeta ug pari. Apan labaw sa tanan, makita usab nato sa Daang Tugon kung unsa ang kinahanglanon aron mahimong Mesiyas. Ang Daang Tugon naghatag ug mubo nga paglarawan sa trabaho sa Mesiyas, ang Dinihugan sa Dios nga maoy maglukat sa iyang katawhan. Ato kining mabasa sa mga sulat sa mga propeta, labina kang Isaias. Mabasa kini sa mga sulat sama sa Isaias 42. Siya mao ang gikahimut-an sa Dios. Siya magdalag ug hustisya. Kining tanan ug uban pa. Sa Isaias 50, atong mabasa ang mahitungod sa nag-antos nga sulugoon, ang Mesiyas sa Dios, nga iyang gipaubos ang iyang kaugalingon atubangan sa Dios ug tawo. Magmasinugtanon siya.

Gatusan ka mga katuigan ang nilabay ug miabot na gayod ang Mesiyas. Nahibalo Siya kung unsa ang iyang trabaho ug iya gayong buhaton kini nga matinud-anon. Sa iyang hunahuna, walay duda kung unsa gayod ang angayan niyang himoon. Nahibalo siya Daang Tugon nga ang Mesiyas kinahanglan gayod magpaubos. Sa iyang pagkasinabak, pagkahimugso ug pagkabatan-on iya ng gitakda kung unsay agian sa iyang kinabuhi. Walay duda nga iyang nadunggan nga ang iyang paryenti nga si Juan tua sa deserto, didto sa Suba sa Jordan nagbunyag sa mga katawhan sa Dios. Nahibalo siya nga kinahanglan mo-adto usab siya. Ang iyang pagkanaug sa pagpaubos nagpadayon diha sa pormal nga pagdihog kaniya ug sa iyang pagsulod sa iyang yutan-ong ministeryo. Samtang atong suihon kini karon, atong makita nga samtang nagapanghitabo kini, aduna usab kalabutan kini sa atong yutan-ang pagpamuhat isip nakaambit usab sa iyang dihog. Iwali ko kaninyo and Pulong sa Dios karon nga kabuntagon uban ang tema:

Pinaagi sa pagpaubos sa iyang kaugalingon, si Kristo misugod sa iyang yutan-ong pagpamuhat

Atong tan-awon ang iyang:

1. Pagbunyag
2. Pagtintal

1. Ang iyang Pagbunyag.

Si Marcos nagsugod niini nga bahin pinaagi sa pagpadumdom kanato sa Daang Tugon. Gigamit niya ang pamulong nga “Niadtong panahona...” Gipili gayod niya kini nga mga pulong aron ipalutaw gayod nga ang nagapanghitabo karon usa ka balaanong kasaysayan, sama sa kasaysayan sa Daang Tugon. Kini balaan – nagpasabot nga kini adunay kalabutan sa dakong plano sa Dios sa pagluwas. Kini kasaysayan – tungod kay nahitabo gayod kini sa kalibutan ug sa usa ka panahon 2000 ka tuig na ang milabay.

Ug sa kalit lang, ang ngalan ni Hesus mitungha. Ang iyang ngalan nahisgotan sa bersikulo 1 isip kabahin sa titulo sa maong libro, apan bisan pa adto, ang mga detalye gamay ra kaayo. Ang bersikulo 1 nagsulti kanato nga siya ang Kristo, ang Mesiyas. Siya usab ang Anak sa Dios. Apan gawas niana, murag wala na kaayo hatagi ug pagtagad ni Marcos ang mahitungod sa pagsabak kaniya ug pagkahimugso sa Manluluwas. Sa sulat ni Marcos, ang Balaang Espirito buot nga magtudlo sa atong atensyon diretso ngadto sa pinaka-importante nga panahon sa kinabuhi sa Manluluwas.

Giingnan kita nga si Hesus gikan sa lungod sa Nazareth sa probinsiya sa Galilea. Si Mateo naghigot nga gikan siya sa Galilea, apan si Marcos ra ang naghigot nga ang lungsod nga gigikanan ni Hesus mao ang Nazareth. Sa unang mga bersikulo sa Marcos, atong nadungog ang pundok sa daghang tawo nga gikan sa mga dagkong lugar sa Palestina: Judea ug Jerusalem. Ug karon ang Mesiyas mitungha ug giingnan kita nga ang Mesiyas naggikan sa gamay nga lungsod. Kung wala pa lamang naggikan si Hesus didto, ang Nazareth usa lamang unta ka gamay nga lugar nga hikalimtan na. Kung sa ato pa karon, ang mga tawo naggikan sa mga dagkong ciudad, apan si Hesus gikan lamang sa usa ka lungsod nga daw wala ngani sa mapa. Walay usab gani kabantog sa iyang ngalan.

Ang ubos nga kagikan ni Hesus maoy nag-andam kanato sa sunod nga mahitabo. Usbon ko, si Marcos pinili lamang ang mga detalye nga iyang gitagaan ug pagtagad. Ang uban nga nagsulat sa ebanghelyo naglakip sa mga panag-estoryahanay tali sa Ginoong Hesus ug kang Juan. Apan si Marcos nagsulat lamang niini: si Hesus gibunyagan ni Juan sa Suba sa Jordan. Igo na kana sa katuyuan ni Marcos; apan daghan ang buot ipasabot niini.

Usbon ko nga sa gihisgutan nato sa nilabay nga mga bersikulo, ang pagbunyag ni Juan naandan na sa mga Judio. Kung ang mga Gentil gusto mahimong sumusunod sa relihiyon sa mga Judio, usa sa mga gikinahanglan mao ang pagpabunyag. Apan si Juan nag-ingon nga ang mga Judio ang kinahanglan nga bunyagan. Mga mahugaw sila ug mao nga dili sila andam sa pag-abot ni Kristo. Ang pagpabunyag nila kang Juan nagpasabot kini nga ilang gipaubos ang ilang kaugalingon atubangan sa Dios ug sa mga tawo.

Tinuod nga si Ginoong Hesus walay sala ug perpekto. Dili siya hugaw. Apan sa iyang pagpabunyag kang Juan, iyang gitingub ang iyang kaugalingon sa mga tawong mahugaw. Siya nagpahigsama kanila ug sa ilang kahimtang. Iyang gipaubos ang iyang kaugalingon atubangan

sa Dios ug sa iyang katawhan. Ang langitnong Anak sa Dios, hingpit ug balaan, nagpabunyag kang Juan, ug sa pagbuhat niya niini iyang gipatumong kung unsay iyang buhaton sa iyang pag-antos ug kamatayon: pas-anon ang tanang sala sa katawhan ug mahimong sad-an alang kanila. Iyang gipaubos ang iyang kaugalingon niining tungora ug sa unahan iya usab ipaubos ang iyang kaugalingon ngadto sa pinakalawon nga kaulawon ug kaguul, pagkuha sa atong mga sala, sa atong kaulawan, sa atong imperno. Mga igsoon, tan-awa ang atong Ginoong Hesus diha sa tubig sa Jordan. Isentro ang mga mata sa imong hunahuna ngadto kaniya. Kini larawan ni Josue nga nagalatas sa suba ug gidala ang katawhan sa Dios ngadto sa Yutang Saad. Kini mao ang imong Manluluwas ug unsang matang sa Manluluwas kini! Nahimo siyang sala alang kanimo. Nahimo siya nga ingon sa makasasala aron ikaw mahimong dili na makasasala. Nahimo siyang sala aron ikaw mahimong matarong atubangan sa Dios. Ang iyang pagpaubos sa iyang pagbunyag nagpasabot sa iyang kinabubut-on nga paghimo niana kanimo. Ang iyang gugma kanimo. Dili ba kana magpuno kanimo sa mga pagdayeg? Sa gugma ug pagpasalamat?

Ang bersikulo 10 nagsulti kanato nga samtang si Hesus mihaw-as gikan sa tubig, nakita niya ang langit nga naabli. Sa makausa pa si Marcos naggamit ug pulong ug larawan sa Daang Tugon. Mura ug naghunahuna siya sa Ezekiel 1:1 kon diin nakita ni Ezekiel nga naabli ang langit ug nakakita siya ug mga pana-awon sa Dios. Ang pagkaabli sa langit nagpasabot nga kini langitnong pagpadayag. Usa ka butang nga kaniadto gitago, karon ipadayag na ug ablihan alang sa tanan nga makita ug madungog. Dili tanan motoo niini, apan sila makakita ug makadungog

Ang unang nakita mao ang Espiritu nga mikunsad kang Hesus sama sa salapati. Kung tun-an gayod, ang pulong kalapati adunay daghan ipasabot sa Biblia. Sa Mga Awit ni Solomon pananglitan, ang kalapati nagpasabot ug gugma. Si Noe nagpadala ug salapati tulo ka beses human ang Baha. Ang mga salapati kabahin sa sistema sa sakripisyo sa Daang Tugon. Ang salapati nagsimbolo usab ug gugma, bag-ong kinabuhi, kaputli ug sakripisyo. Kaning tanan daw nalakbit niini nga imahe. Sa atong hunahuna murag usa ngani kini ka puti nga salapati. Apan ang teksto wala nag-ingon sa puti kini. Ngani kadaghanan sa mga kalapati sa Palestina dili gayod puti. Atong gihunahuna nga puti kini, apan ang Biblia wala nagsulti kanato. Dili na tingali importante kaayo.

Labing importante dinhi mao ang kahulugan ug mensahe sa nahitabo sa Jordan. Si Kristo gidihogan sa Balaang Espiritu. Nahibalo kita niini gikan sa gisulti ni Pedro sa Buhat 10:38. Si Pedro miingon nga niini nga panahon, “Gihatagan sa Dios si Jesus sa Espiritu Santo ug gahom...” Klarohon nato unsa gayoy nahitabo dinhi. Wala kini nagpasabot nga wala ang Balaang Espiritu kang Ginoong Hesus. Isip Anak sa Dios, siya nahiusa sa Amahan ug sa Espiritu gikan pa sa walay sinugdan. Sa pagdihog kaniya, ang Dios nagsangyaw sa publiko nga mao kini siya ang Mesiyas. Mao kini siya ang Propeta sa Israel, Pari, ug Hari. Ang atong Propeta, Pari, ug Hari. Kini siya mao ang Tawo nga giandaman ni Juan ug dalan. Kini mao ang paglaum sa Israel nga ania na gayod. Dili lamang kana, apan ang iyang pagdihog nagpasabot usab sa pagsugod sa iyang yutan-ong pagpamuhat. Sama ra nga ang mga presidente ug primo ministro magsugod sa ilang pamunuan pinaagi sa inagurasyon. Mao kini ang inagurasyon ni Kristo

Kita usab nahiusa kaniya pinaagi a pagtoo ug pamuhat sa Balaang Espiritu. Nagpasabot nga kita nakaambit sa iyang dihog. Sama nga siya Propeta, Pari, ug Hari, mao usab kita. Sa nilabay nga panahon nakadungog kita ug mga wali sa Lord's Day 12, nakadungog na kita kung unsay pasabot niana – ug walay duda, makadungog pa kita mahitungod niini sa umalabot. Sa pagkakaran, dumdom lamang nga kining tulo ka katungdanan, Propeta, Pari, ug Hari, importante kaayo sa atong pagsabot kung kinsa si Kristo ug unsay iyang gibuhat ug kinsa kita diha kaniya. Ngani, kung basahon mo ang Biblia ug sabton unsay pasabot niini sa imong kinabuhi, makatabang nga imong hunahunaon ang mahitungod nga Propeta, Pari ug Hari. Panaglitan, kung naa ikaw sa Daang Tugon, mangutana ka kung ang usa ka tawo nga imong mabasa Propeta, Pari o Hari ba. Sa unsa usab nga paagi nga siya nagtudlo kang Kristo nga maoy hingpit nga Propeta, Pari ug Hari? Ug diha dayon nimo tan-awon kung unsaypasabot sa teksto kanimo ug sa imong kinabuhi.

Ang atong pagkahiusa kang Kristo mahinungdanon usab kung atong tan-awon ang bersikulo 11. Dili lamang nga adunay nakita nga imahe sa salapati – aduna usab tingog nga nadungog. Ang tingog sa Dios. Niingon siya, “Ikaw ang akong hinigugma nga Anak. Nalipay gayod ako kanimo.” Klaro nga kini gayod mao ang Dios nga Amahan. Siya nagpahayag niini aron ang tibuok kalibutan makaila nga mao kini ang Anak sa Dios. Ang Anak sa Dios nga gihigugma ug nakapahimout sa Amahan. Tanan nga anaa didto niadtong taknaa nakadungog nga ang relasyon sa Amahan ug Anak mao gayod ang gugma. Nahimuot gayod ang Amahan kaniya tungod kay gidihogan siya aron magsugod sa iyang ministeryo lahos sa iyang pagtuman, pagantos, kamatayon, pagkabanhaw ug pagkayab, wala gayod siya mounding.

Adunay tulo ka butang nga mahinungdanon niini nga hitaboa. Una, kini lunsay nga ebanghelyo. Ang maayong balita dinhi mao nga gipakita diri nga ang atong Manluluwas hingpit gayod. Mao kini ang makapas-an sa tanang tang sala ug silot. Kini siya ang hingpit nga magtuman alang kanato. Siya lamang ang makaluwas kanato ug wala nay lain pa. Giluwas kita niya gikan sa tunglo sa sala ug sa gahom sa sala. Busa mga igsoon, atong itutok ang atong mata ngadto kaniya lamang.

Ang ikaduha, dumdoma nga ikaw nahiusa sa atong Manluluwas. Tungod kay nahiusa ka kaniya, ang Dios usab nagsulti kanimo sa samang mga pulong sa atong teksto. Siya nagsulti kanimo sa imong pagbunyang ug nagsulti gihapon hangtod karon. Katingalahan, dili ba? Samtang ikaw nagpabilin kang Kristo pinaagi sa pagtoo, ang Labing Gamhanang Dios nakigsulti kanimo, “Ikaw ang akong hinigugma nga Anak. Nalipay gayod ako kanimo.” Paminawa ang iyang tingog karon. Nakasala kita matag adlaw, pero nahigugma gihapon siya kanato tungod kay kita anaa man kang Kristo. Nahimuot siya kanato. Gidawat kita diha kang Hesus. Usahay dili nato kini bation, apan ang Pulong sa Dios matuod. Si Martin Luther adunay mubo nga awit mahitungod niini. Murag ingon niani: “Ang mga pagbati moabot ug mahanaw, ang mga pagbati malimbongon. Ang akong kasigurohan mao ang Pulong sa Dios, ug wala nay laing angayan toohan pa.” Si Luther nakigbugno batok sa mga pagduda ug pangutana ug kinahanglan niya ipahinumdom ang iyang kaugalingon nga siya modangop kang Kristo ug sa iyang Pulong. Tingali ikaw usab adunay sama nga pagkigbugno. Ayaw saligi ang imong pagbati, ayaw itukod ang imong pagtoo sa imong pagbati, salig kang Kristo, tutok kaniya ug paminawa ang tingog sa Dios kaniya ug kanimo: Ikaw ang akong hinigugma nga Anak. Nalipay gayod ako kanimo.

Tinuod gayod kini bisan kung gibati mo man kini o wala. Pagkatin-aw gayod nga ebanghelyo kini, dili ba? Pagkaanindot, pagkamatuod.

Ang atong pagtoo niini adunay dakong bili sa atong mga kinabuhi ug relasyon. Mao kini ang ikatulong butang. Kung kita anaa kang Kristo, ang Dios nga Amahan nagsulti kanato ug mga pulong pagpamatuod, gugma, ug pagdasig kanato. Unsaon man nato kini pagkinabuhi? Dili ba angayan nga mao usab kini ang buhaton nato sa uban? Hunahunaa kuno labina alang sa atong mga anak. Subo kaayo nga adunay mga pamilya nga dili ginadasig ang ilang mga anak. Samot na gayod nga subo kaayo nga aduna usab mga pamilya sa simbahan nga dili man lang nila ginasultihan ug mga pulong paghigugma ang ilang mga anak. Makasubo! Unta kay sila nasayod man sa gugma sa Amahan kang Kristo, kay nadungog man nila ang mga pulong sa paghigugma, ang mga pamilya sa simbahan magbuhat unta niini. Usahay adunay mga prinsipyo nga kung ang pagdasig, pagdayeg ug pagsulti ug mga pulong sa paghigugma makapahambog na hinoon sa mga bata. Apan dili hinoon. Makahimo hinoon kita ug kultura ug kinaiya nga hamburgero kung dili kita mosuporta ug modasig sa matag usa. Tungod kay wala may modasig kanimo, mapugos na hinoon ka nga mobuhat sa kinaugalingon lamang. Hunahunaa kuno si Kristo. Grabe gayod siya ka mapahiubsanon. Apan ang Amahan nagdayeg ug nagdasig kaniya. Ug bisan sa iyang sulat ngadto sa pito ka iglesia sa unang tulo ka kapitulo sa Pinadayag, makita nato nga ang Anak sa Dios nagdayeg ug nagdasig sa mga iglesia kung angayan kini – sama nga ang iyang Amahan nagbuhat usab niini kaniya. Tinuod adunay usab panahon sa pagbadlong, apan aduna usab a pagdayeg. Mga igsoon, sa atong pagkinabuhi sa atong pagkahiusa kang Kristo, atong himoon ang tanang higayon sa pagdasig, pagdayeg ug pagsuporta sa matag usa ug labina gayod sa atong mga anak.

Moadto kita sa ikaduha nga eksena sa atong teksto, mao ang pagtintal sa atong Ginoo.

2. Ang pagtintal kaniya

Sa makausa pa, ikomapara sa uban nga sulat sa ebanghelyo, hamubo lamang gayod ang sinulat ni Marcos. Paspas kaayo ang mga hitabo. Usa ka takna ang Espirito mikunsad kang Kristo, apan sa sunod nga takna – “dihadiha!” ingon pa niya – gipaadto siya sa Espirit sa kamingawan. Unsa man ang tuyo sa Balaang Espiritu nga mensahe alang kanato gikan niini?

Ang kamingawan adunay kahulogan dinhi. Si Juan didto sa deserto ug karon si Kristo usab gipaadto sa deserto. Sa atong nadunggan sa milabay nga semana, ang deserto usa ka lugar nga diin ang Israel kinahanglan moagi padulong sa kaluwasan didto sa Yutang Saad. Ang samang paagi nagpadayon kang Kristo sumala sa atong teksto. Mura ug si Kristo naghimo pag-usab sa nahitabo nga pagpangbiya (exodus) gikan sa Ehipto. Sama nga ang Israel didto sa kamingawan ug gitintal ug napakyas, si Hesus usab nia sa kamingawan ug gitintal, apan wala siya makasala.

Mao nga dunay mga pangutana nga makasala ba kaha si Kristo? Ang uban nag-ingon nga tungod kay siya Anak sa Dios, tungod kay siya Dios, imposible lang kaniya nga matintal. Apan tinuod ba nga tintasyon kung dili man galing posible nga madani ka? O tiawtiaw lang ba kadto nga tintasyon? Ang sulat sa mga Hebreohanon nagsulti kanato nga gitintal gyud siya sama kanato, apan wala iya nakasala. Kinahanglan gayud tinuod kadto nga tintasyon kung kani nga pulong adunay bili kanato. Sa ato pa, pwede gayod nga makasala unta si Hesus. Gitintal gayud

siya, apan dili sama sa Israel, wala siya makasala. Kini naghatag kanato ug kahupayan tungod kay nasayod gyud siya kung unsay atong kasinatian samtang kita gitintal. Nahibalo siya kung unsay bation kung birahon ka ngadto sa kaulag ug kaibog sa daghan butang. Ikaw adunay Manluluwas nga nahibalo niining tanan ug nakasabot. Labi na, ikaw adunay manluluwas nga nakabarog batok sa tintasyon, ug ang pagtuman niya nagtabon sa tanan mong kapakyasan. Ug tungod kay anaa ka kaniya, ikaw usab makabarog samtang ikaw nag-agi sa proseso sa pagbalaan.

Si Marcos nagsulti kanato nga kini nga eksena nahitabo sulod sa 40 ka adlaw. Wala nagpasabot nga gitintal iya sulod sa 24 ka oras matag adlaw. Siya didto sa deserto sa 40 ka adlaw ug didto giatubang niya ang mga tintasyon ni Satanas. Ang numero nga 40 ka adlaw makita nato sa ubang bahin sa Biblia. Kasagaran konektado kini sa mga importanteng panghitabo sa kasaysayan sa kaluwasan: ang ulan sulod sa 40 ka adlaw sa Lunop, ug ang tubig miuga sa samang kadaghanon sa adlaw, si Moises didto sa bukid sa Sinai sa 40 ka adlaw, si David ug Solomon naghari matag usa sulod sa 40 ka tuig, ug daghan pa. Numero kini sa paghingpit alang sa nagkalainlaing mga tawo ug katungdanan: mga propeta, mga pari, ug mga hari. Busa angayan lamang kang Kristo, ang Dinihogan nga didto usab sa kamingawan sulod niining mga adlaw.

Ang detalye nga dili makita sa ubang sulat amo kining gisulti ni Marcos sa bersikulo 13. Ngano man nga ang Espirito nagsugo man kan Marcos nga iapil kini? Mahimo nga aduna kini koneksyon kang Adan didto sa Harden sa Eden. Si Kristo mao ang ikaduhang Adan didto sa deserto. Ang unang Adan gitintal sa harden sa kahupayan ug kasigurohan. Didto walay mga hulga – ang tanan lunsay ug berde ug katingalahan – ang pagkaon andam kanunay. Ang ikaduhang Adan gitintal pinaagi sa pagbiya ug sa kakuyaw, sukwahi sa unang Adan. Tingali mao kini ang bout ipasabot niini nga detalye. Ug dinhi gipakita nga ang Ginoong Hesus nag-inusara ra gayod sa iyang pag-agi sa tintasyon.

Karon si Marcos wala na magulti kanato kung unsay nahitabo matapos niadto. Mura na ug nagtoo na siya nga nahibalo na kita, pinaagi sa ubang bahin sa Biblia o kaha sa mosunod nga mga hitabo. Nagtoo siya nga nahibalo na kita nga nagmadaugon ang Ginoong Hesus. Ang iyang kadaugan batok ni Satanas usa na usab ka panagsangka sa Gubat tali sa bitin ug sa babaye. Kini nga gubat madaog sa hingpit ni Kristo didto sa Golgotha.

Apan sa kasamtangan, atong makita nga si Satanas nakuhaan sa iyang gahom ug pagdumala. Dili niya mapugngan ang kadaugan ni Kristo. Pagkahuman sa maong panagsangka, ang Dios nagpakita sa iyang gugma ug pag-atiman pinaagi sa pagpadala ug mga anghel nga magministeryo kang Kristo. Wala kita gisultihan kung unsa gayod ang gibuhay sa mga anghel, apan masabot nato nga sila naghatag ug pagkaon nga makalig-on kang Kristo. Ang mga anghel pamatuod nga ang Amahan nahigugma gayod sa iyang Anak ug nag-atiman kaniya.

Alang kanato karon, nasayod na kita sa hingpit nga kadaugan ni Kristo. Tungod sa iyang kadaugan gideklara na kita nga matarong atubangan sa Dios ug gibalaan na sa iyang mga mata. Ug tungod niini nga kadaugan, kita nagtubo usab sa pagkabalaan sa matag adlaw samtang nia pa kita ning kalibutana. Samtang nabuhi kita dinhi, makasiguro kita sa gugma ug pag-atiman sa Dios kanato. Iyang gipakita kini nga pag-atiman sa daghan mga paagi, lakip na ang mga anghel. Ang ubang mga Kristohanon nagtoo nga ang matag usa ka magtotoo adunay anghel nga magbalantay. Apan ang kamatuoran sa Biblia labaw pa niini: adunay kasundalohan sa mga

anghel nga nagbantay kanato, dili lamang pag-alagad sa Dios kondili pag-alagad kanato. Hunahunaa ang gisulti sa Hebreo 1:14, “Dili ba nga ang mga anghel mga espiritu lang nga ginasugo sa Dios nga motabang sa mga tawo nga modawat sa kaluwasan?” Ang maayong balita karon lakip ang kamatuoran nga ang Dios nag-atiman kanimo pinaagi sa mga anghel, sama nga siya nag-atiman sa iyang Anak didto sa kamingawan!

Mga hinigugma nga igsoon, ang pagbunyag ug pagtintal sa atong Manluluwas mga kinahanglang lakang nga iyang agihan sa iyang pagpaubos. Kung ato kining pamalandungan – lantawa kung unsay mahimo niini sa imong kasingkasing ug kinabuhi. Samtang imong itutok ang imong mata kang Hesus, ang sinugdanan ug kahingpitan sa atong pagtoo, tan-awa unsaon sa Dios pagbag-o kanimo, pag-umol kanimo, paghimo kanimo nga bag-ong tawo, ang tawo nga gitinguha sa Dios nga mahimo ka. Iya kanang buhaton ug dayegon ta siya tungod niana, karon ug sa walay katapusan. Amen.